

MEI 2025 / BIL. 13 / 2025

EON

Epitome of Nature

PENDIDIKAN BERKUALITI



MAJALAH PP BIOLOGI
UITMCNS

ISSN 2773-5869



9 772773 586005

KOMITED MEMBENTUK JIWA BUMIPUTERA: INSPIRASI DR. WAN NORMILA MOHAMAD

Nurliyana Mohamad

Pusat Pengajian Biologi, Fakulti Sains Gunaan, UiTM Cawangan Negeri Sembilan, Kampus Kuala Pilah, Pekan Parit Tinggi, 72000 Kuala Pilah, Negeri Sembilan

mnliyana@uitm.edu.my

EDITOR: AMIRUL ADLI ABD AZIZ

Matlamat Pembangunan Mampan (SDG) ke-4 menekankan kepentingan pendidikan berkualiti yang inklusif dan saksama serta mempromosikan peluang pembelajaran sepanjang hayat untuk semua. Pendidikan berkualiti bukan sekadar diukur melalui pencapaian akademik, tetapi turut merangkumi pembangunan holistik individu dari aspek kognitif, emosi, sosial dan moral. Edisi *Epitome of Nature* (EON) kali ini yang bertemakan SDG 4: Pendidikan Berkualiti menampilkan seorang tokoh pendidik yang bukan sahaja aktif menyampaikan ilmu, malah juga komited membentuk jiwa dan sahsiah pelajarnya seiring aspirasi pendidikan berteraskan nilai.

Dr. Wan Normila Mohamad, atau lebih mesra dikenali sebagai Kak Wan, adalah merupakan seorang pensyarah kanan di Fakulti Pengurusan Perniagaan, Kampus Seremban, UiTM Cawangan Negeri Sembilan.

Dengan pengalaman lebih daripada 27 tahun bersama UiTM, beliau telah memberi impak yang besar dalam dunia akademik, khususnya dalam mendidik dan membimbing pelajar Bumiputera, menjadikan beliau ikon yang sangat sesuai dengan tema EON kali ini.

Dari Dunia Korporat ke Dunia Pendidikan

Sebelum menyertai bidang akademik, Dr. Wan Normila memulakan kerjayanya di sektor swasta. Pengalaman berkhidmat di bawah pelbagai sektor pengurusan di peringkat antarabangsa telah membentuk kecekapan beliau dalam aspek pengurusan dan komunikasi. Namun, kecintaan terhadap ilmu pengetahuan mendorong beliau untuk berhijrah ke bidang pendidikan pada tahun 1996, di mana beliau bermula dengan menjadi tutor dalam bidang Sains Kesetiausahaan di UiTM Kampus Dungun, Terengganu. Sejak itu, beliau terus mengabdikan diri sebagai pendidik dan kini berkhidmat di

UiTM Kampus Seremban. Pada tahun 2016, beliau telah dianugerahkan Ijazah Doktor Falsafah (Ph.D) dalam bidang Perkhidmatan Pemasaran daripada Universiti Sains Malaysia (USM), sekali gus mengukuhkan lagi kepakaran beliau dalam bidang yang diceburi.



Gambar 1: Dr. Wan Normila Mohamad di majlis penganugerahan Ijazah Doktor Falsafah daripada Universiti Sains Malaysia

Falsafah dan Matlamat Sebagai Pendidik

“Pendidikan berkualiti adalah sistem pendidikan yang mampu menyediakan pengalaman pembelajaran yang holistik dan relevan serta mampu memupuk potensi pelajar secara optimum. Ini bagi memastikan setiap pelajar memperoleh ilmu, kemahiran, nilai, dan sikap yang diperlukan seorang insan untuk mencapai kejayaan dalam kehidupan mereka serta menyumbang kepada pembangunan masyarakat (terutama Bumiputera) dan negara”.

Demikian jawapan Dr. Wan Normila apabila ditanya tentang definisi pendidikan berkualiti menurut perspektif beliau. Sebagai seorang pendidik, Dr. Wan Normila bukan hanya menyampaikan ilmu, malah berperanan sebagai pembimbing dan motivator. Falsafah beliau dalam pengajaran menekankan pentingnya membangunkan semangat dan keazaman dalam diri pelajar.

“Kak Wan mahu pelajar percaya pada kebolehan dan keupayaan diri mereka sendiri, menjadi individu yang bertanggungjawab serta berintegriti, dan mencapai kejayaan tertinggi dalam kehidupan mereka.”

Dr. Wan Normila juga bermatlamat untuk membantu pelajarnya menguasai minda dan diri sendiri, bukan sahaja dalam memahami teori tetapi juga dalam menghubungkannya dengan situasi sebenar.

Beliau juga percaya bahawa pembelajaran tidak pernah berakhir dan pelajar tidak seharusnya berputus asa dalam apa jua keadaan.

Gaya Pengajaran: Tegas dengan Keikhlasan

Disebalik perwatakan lemah-lembut dan keibuan, terselit ketegasan yang menjadi teras pendekatan pengajaran Dr. Wan Normila. Sesuai dengan prinsip yang dipegang beliau dalam pengajaran iaitu “tegas tetapi penuh keikhlasan”.

“Kak Wan bukan sekadar menyampaikan ilmu tetapi benar-benar mahu pelajar memahami dan mengaplikasikan ilmu dalam kehidupan serta kerjaya mereka. Pendekatan ini adalah kunci untuk Kak Wan dalam memastikan setiap pelajar mendapat bimbingan yang diperlukan, termasuk memberi dorongan dan teguran secara berhemah”.

Dalam kelas, beliau menekankan disiplin, tanggungjawab dan ketepatan

masa. Pelajar diminta menghormati jadual pembelajaran dan menyerahkan tugas mengikut tarikh akhir yang ditetapkan. Namun, beliau juga memberi ruang untuk pelajar membuat pilihan—dengan syarat mereka harus bertanggungjawab atas keputusan yang diambil.

“Kak Wan sentiasa ingatkan anak-anak didik untuk tidak meninggalkan solat lima waktu kerana ia adalah tiang kepada segalanya. Jadi, Kak Wan sendiri harus sentiasa menjaga tata susila, integriti diri dan banyak berdoa dan bermunajat untuk menjadi pendidik yang mampu menjadi contoh kepada anak-anak didik” ujar beliau.

“Pelajar juga harus memahami kepentingan menghormati pensyarah, rakan-rakan, serta ahli keluarga mereka. Etika komunikasi yang baik di dalam kelas, adab ketika bertanya soalan, serta kepentingan menjaga integriti akademik seperti tidak meniru atau menyalin tugas sangat ditekankan” lanjut beliau lagi.



Gambar 2: Dr. Wan Normila bersama pelajar-pelajar beliau di UiTM

Cabaran Pendidik Masa Kini

Dalam era pendidikan yang sentiasa berubah, cabaran yang dihadapi pendidik juga sentiasa berubah. Realitinya hari ini, menjadi seorang pendidik bukan sekadar menyampaikan ilmu, tetapi juga perlu berhadapan dengan pelbagai kenehaman dan keunikan pelajar. Setiap semester membawa cabaran baru. Namun, bagi Dr. Wan Normila, inilah keindahan menjadi seorang pendidik.

“Kita perlu sabar sebab setiap semester sistem berubah, pelajar berubah. Tetapi kalau kita ikhlas, kita akan dapat kepuasan dalam mendidik” jelasnya dengan tenang.

Tambahan pula, pandemik COVID-19 telah banyak mengubah lanskap sektor pendidikan negara. Walaupun hampir lima tahun telah berlalu, para pengajar dan pelajar masih dalam proses menyesuaikan diri dengan perubahan ini. Pensyarah khususnya dituntut untuk lebih tangkas dan fleksibel dalam mengadaptasi kaedah pengajaran serta pendekatan pembelajaran agar penyampaian ilmu kekal berkesan. Bagi Dr. Wan Normila, kunci utama dalam mendepani segala cabaran ini adalah kesabaran dan keikhlasan.

“Kesabaran. Dalam dunia pendidikan, terutama di institusi yang sentiasa berubah sistem dan pelajarannya setiap semester, kesabaran itu sangat penting. Kita perlu ikhlas dalam mendidik, bukan hanya kerana gaji, tetapi kerana ilmu yang kita sampaikan adalah pahala yang berkekalan,” katanya penuh makna.

Pesanan Buat Warga Pendidik

Kredibiliti dan kepakaran yang ada pada tokoh pengajar ni sememangnya tidak perlu disangkal lagi. Sepanjang perkhidmatan beliau di UiTM, Dr. Wan Normila telah menerima pelbagai anugerah, antaranya Anugerah Tokoh Akademik 2022 dan Anugerah Pengajaran 2023 di Anugerah Akademik Universiti (AAU). Sebagai seorang pendidik berpengalaman, Dr. Wan Normila tidak lokek berkongsi nasihat buat generasi pendidik muda.

Ujarnya, penting untuk para pensyarah dekat dengan pelajar dan menyentuh hati mereka, agar ilmu yang disampaikan benar-benar memberi kesan. Beliau juga kerap menekankan peranan pensyarah untuk sentiasa menasihati pelajar untuk seimbangkan akademik dan kerohanian.

Selain itu, pesannya kepada pensyarah muda juga jelas:

“Sentiasa merendah diri. Hormatilah pensyarah senior dan ambil peluang untuk belajar sebanyak mungkin daripada mereka. Jika kita hormat, mereka akan beri seratus peratus komitmen dalam memberi tunjuk ajar.”

Di penghujung perbualan, Dr. Wan Normila menitipkan beberapa pesanan penuh makna buat warga pendidik, khususnya pensyarah di UiTM.

“Jika ingin menjadi pendidik terutama di institusi seperti UiTM, seseorang itu perlu mempunyai keikhlasan dan kesabaran yang tinggi. Kebanyakan pelajar di sini datang dari latar belakang B40 dan mereka sangat memerlukan bimbingan untuk mencapai tahap yang setanding dengan bangsa lain. Jika seseorang benar-benar ingin menjadi pendidik di sini, dia harus ikhlas dan bersedia untuk menyumbang kepada pembangunan anak bangsa.” ujar beliau penuh ketulusan.

Beliau turut menambah:

“Selain itu, jangan lupa untuk terus membina hubungan yang baik dengan semua pihak. Kita tidak tahu akan datang bila kita perlukan bantuan orang lain. Jadi jagalah hubungan baik dengan semua orang”



Gambar 3: Dr. Wan Normila menerima Anugerah Tokoh Akademik di Anugerah Akademik Universiti (AUU) 2022

"Ilmu yang kita kongsi hari ini mungkin akan dikenang oleh pelajar suatu hari nanti. Itulah yang membuat dunia pendidikan begitu bermakna," tambah beliau lagi sambil mengimbau kisah suka duka bersama para pelajar.

Ibu kepada enam cahaya mata ini, yang dihubungi penulis secara maya, meluahkan rasa terima kasih kerana pengorbanannya selama lebih 27 tahun sebagai pendidik dihargai pelbagai pihak. Penghargaan yang diterima menjadi pembakar semangat

untuk beliau terus menyumbang sehingga ke penghujung kerjaya akademiknya. Beliau turut mengambil kesempatan untuk merakamkan ucapan terima kasih kepada UiTM, khususnya kampus-kampus tempat beliau pernah berkhidmat.

"UiTM telah memberi peluang kepada Kak Wan untuk 'grow' bersama UiTM. Rezeki Kak Wan dan anak-anak mengalir dari UiTM, dan lima anak Kak Wan adalah alumni UiTM," katanya dengan penuh rasa syukur.

Sebagai penutup, Dr. Wan Normila mengakhiri pesanan beliau dengan memetik sepotong kata-kata yang disampaikan di dalam amanat Naib Canselor UiTM, yang menjadi pegangan hidupnya sebagai seorang pendidik:

Menuntut ILMU itu TAKWA

Menyampai ILMU itu IBADAH

Mengulang-ulang ILMU itu ZIKIR

Mencari ILMU itu JIHAD

— Imam Al-Ghazali